

30 OCT 1999

MAHATHIR-LEEKPAI

MAHATHIR DAN CHUAN LEEKPAI SAKSI PERJANJIAN JUALAN GAS

ALOR SETAR, 30 Okt (Bernama) -- Petronas dan Lembaga Petroleum Thailand (PTT) hari ini memeterai satu perjanjian jualan gas dengan pemaju Blok A-18 di Kawasan Pembangunan Bersama Malaysia-Thai (JDA) untuk membeli bersama gas asli daripada blok luar pesisir di JDA.

Jualan gas asli dari Blok A-18 merangkumi kawasan seluas 7,250 kilometer persegi terletak anggaran 250 kilometer dari Songkhla, Thailand.

Kontraktor perkongsian pengeluaran bagi Blok A-18 adalah Petronas Carigali (JDA) Sdn Bhd yang memegang 50 peratus kepentingan, Triton Oil Company of Thailand (JDA) Ltd (49.5 peratus) dan Triton Oil Company of Thailand (0.5 peratus).

Pemeteraian perjanjian itu disaksikan oleh Perdana Menteri Datuk Seri Dr Mahathir Mohamad dan Perdana Menteri Thailand, Chuan Leekpai.

Di bawah GSA, penjual-penjual (MTJA dan kontraktor berkongsi pengeluaran) perlu menghantar gas pada kadar kontrak harian awal sebanyak 390 juta kaki padu sehari bagi tempoh 20 sehingga tahun 2022.

Gas akan dihantar kepada pembeli bersama menerusi saluran paip luar pesisir 34 inci 270 kilometer dari JDA ke Songkhla dan saluran paip pesisir pantai 36 inci 90 kilometer ke Kedah di utara Malaysia.

Selain itu, Cakerawala Gas Field, satu daripada lapangan gas di Blok A-18, akan dimajukan sebagai Projek Gas Fasa Pertama dengan tarikh cadangan untuk dimulakan pada suku tahun kedua 2002.

Jumlah pelaburan bagi Pembangunan Gas Fasa Pertama bagi Cakerawala Field di JDA dianggarkan pada AS\$800 juta (AS\$1 =RM3.80).

MTJA adalah badan berkanun yang mempunyai hak eksklusif, kuasa, kebebasan dan hak untuk meneroka dan mengeksploitasi sumber asli terutama sumber petroleum di JDA di bawah Akta Lembaga Bersama Malaysia-Thailand 1990/B.E. 2533 bagi Malaysia dan Thailand.

Selain daripada perjanjian gas dan perjanjian pemegang saham, Petronas dan PTT juga memeterai Perjanjian Teroka Bersama Induk, di mana ia adalah perjanjian payung yang merangka kemungkinan kerjasama di masa depan antara kedua-dua pihak di selatan Thailand dan utara Semenanjung Malaysia menggunakan gas JDA.

Pemeteraian perjanjian hari ini adalah sebagai tanda kemuncak kepada usaha oleh kerajaan Malaysia dan Thailand untuk memajukan bersama sumber hidrokarbon di kawasan bertindih mereka dan membuka laluan bagi penerokaan bersama besar-besaran antara kedua-dua negara jiran.

Ia juga menandakan satu langkah utama ke arah merealisasikan Trans-Asean Gas Grid untuk menghubungkan dan mengembangkan prasarana sedia ada dan masa depan Asean bagi memenuhi keperluan tenaga yang semakin meningkat.

-- BERNAMA

MK ZK MA